



## **Aningaasaqarnermut Naalakkersuisoq**

**Ulloq:** 9. september 2020  
**J.nr.:** 01.31.06/20-00900

### **Aningaasaqarnermut Akileraartarnermullu Ataatsimiititaliap pingasunngornermi ulloq 19. august 2020-mi aalajangiineranik Naalakkersuisunut ilisimatitsineq.**

**Suliassaqarfimmut 24-mut, akiliisitsiniartarnermi ikinnerpaaffissatut killiliussat aamma oqaasertaliussassat pillugit akuersissuteqarnissamik qinnuteqaat. – Suliaq nr. 01.31.06/20 – 00900.**

” Naalakkersuisut **inassutigaat**,

- 2020-mut ilassutitut aningaasaqarnermut inatsimmi Suliassaqarfimmut 20-24 Aningaasaqarnermut Naalakkersuisoqarfik aamma Akileraartarnermut Aqutsisoqarfimmut ilanngussami oqaasertaliunneqartut nr. 4-tut akuersissutigineqassasoq”.

### **Aningaasaqarnermut Akileraartarnermullu Ataatsimiititaliap oqaaseqaatai apequtaalu:**

Namminersorlutik Oqartussanit pisassarisat 100 kr.-inik ikinnerusunilluunniit nalillit Akileraartarnermut Aqutsisoqarfimmit nalikilliliissutigineqartarnissaat ilassutitut aningaasaliissuteqarnissamik qinnuteqaammi matumani anguniarneqarpoq. Tamanna Akileraartarnermut Aqutsisoqarfimmi atortunut nutaanut ERP system Prismemut ikaarsaariarnissamut allaffisornikkut ataqatigiissaarneqartussaassaaq, taamaalillunilu ikaarsaariarnissaq taanna Akileraartarnermut Aqutsisoqarfimmut pisariinnerulersissallugu.

Sukumiinerusumik isumaliutiginnereerluni Aningaasaqarnermut Akileraartarnermullu Ataatsimiititaliap sinnersuutigaa ikinnerpaaffissatut killiliussaq 300,00 kr.-inut ikinnerusunilluunniit annertussuilerneqassasoq.

Tamanna tunngavigalugu oqaasertaliussaq ima iluseqartillugu Aningaasaqarnermut Akileraartarnermullu Ataatsimiititaliamit akuerineqarsinnaavoq:

### **” Aningaasaqarnermut Naalakkersuisoq – Suliassaqarfik 20 - 24**

#### **Suliassaqarfimmut 20 - 24 Aningaasaqarnermut Naalakkersuisoq kiisalu**

#### **Akileraartarnermut Aqutsisoqarfik**

Oqaasertaliussaq una suliassaqarfimmi matumani 2020-mut ilassutitut aningaasaliissutitut inatsimmi ilanngunneqassasoq qinnutigineqarpoq:

“Nr. 4

Naalakkersuisut Namminersorlutik Oqartussat pissarsiassaat tamaasa 300 kr.-inik ikinnerusunilluunniit nalillit, erniat, akitsuutit aningaasartuutillu allat ilanngullugit, naleerutsitsinissaminnut pisinnaatinneqarput.”

Tamatuma peqatigisaanik oqaasertaliussanut nassuiaatit tamatuma kingunerisaanik Naalakkersuisunit iluarsineqarnissaat ataatsimiititaliamit inassutigineqarpoq. Oqaasertalius-saq tassungalu nassuiaatit iluarsineqarnermik kingorna iluserilikkamisut iluseqartut ataatsimiititaliamut nassiunneqarnissaannik Naalakkersuisut qinnuigineqarput.

Tamatuma peqatigisaanik aaqqissuussinerup taamaattup assinga pisasaqartunut tamanut, tassungalu ilanngullugu kommuninut qanoq iliornikkut atuutsinneqalersinnaanersoq isu-maliutigeqqullugu Naalakkersuisut ataatsimiititaliamit kaammattorneqarput.

Aalajangiineq matumani pineqartoq aqqutigalugu angorusutaq anguneqarnersoq piffissap naleqquttup qaangiunnerata kingorna nalilersorneqassasoq ataatsimiititaliamit Naalakkersui-sunut inassutigineqarpoq.

Innuttaasunut akiliisinnaassuseqanngitsutut isigineqartunut akiitsunik isumaqatigiissuteqar-nikkut ikililerineq/isumakkeerinnineq eqqarsaatigalugu suliniutit qanoq ittut Naalak-kersuisunit ingerlanneqarpat?

**Aningaasaqarnermut Akileraartarnermullu Ataatsimiititaliap aalajangiinera**

Allanguut siuliani allassimasoq piumasaqaatigalugu Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuersissutigineqarput.**

Inussiarnersumik inuulluaqqusillunga



Hermann Berthelsen

Aningaasaqarnermut Akileraartarnermullu Ataatsimiititaliap siulittaasua